

建置卷之三

建邑寧居規制斯立測景定方陰陽協吉雉堞
森森闕宮翼翼誰擁專城而敢缺失興築必書
具關典則志建置

城池

高城深池所以備不虞固金湯也寶坻自金大
定立縣後卽營建城郭畧見劉晞顏記中以後
廢徙不常靡得而聞其規模大備則自明弘治
間始閱今三百餘年矣孰踵其舊孰增其新取

其可考者著於篇

(城)

寶邑去順天不二百里比於漢之三輔必於城資保障焉顧明初止爲土城永樂定都後猶沿之及弘治庚申知縣莊禪乃議易之以磚請於巡撫洪公報可一時鉅室富民踴躍樂輸度地鳩工甫期而竣高二丈有六尺厚亦如之廣四尺長一千二十八丈四圍壁峭女堦相承屹然壯觀矣至嘉靖末城漸就圯知縣唐鍊設法增修復還舊觀萬歷中知縣管應鳳復築月城複

塢重圍城益完固入

國朝如舊後因連歲雨霖傾頽數處雖間爲補葺終難久支其有同昔時之好義者乎則莊公之績可再舉也

城之四門東曰海濱西曰望都南曰廣川北曰渠陽其城之總名曰拱都

門之上有樓海濱門之樓曰觀瀾望都門之樓曰拱恩廣川門之樓曰迎薰渠陽門之樓曰威遠

城之四隅又有角樓焉左之前曰環碧後曰挹

青右之前曰慶豐後曰樂治

皆弘治時舊制今仍之有記二見藝

文志

池

城之周圍可七里池繞之而貫乎其中莊公禪

既築城遂浚池池深二丈廣倍之又加一焉因

作石堰於水者二北曰開源南曰節流脉絡灤

洄曲曲貫注而城外之河四面環繞如玉帶然

此邑中風水所由聚而物以之繁民以之阜也

迨後日就淤塞幾失舊蹟乾隆七年知縣洪肇

檄允士民之請捐俸倡濬萬畚雲興數月乃集
勒石以記之因念舊志之志城池也但云城而
不及池恐來者且視爲可有可無之數矣安知
所係若斯之重乎特補之而詳晰內外城河之
形勢備觀覽焉

內城河

本渠河之流自城東北隅開源水門入
由武曲橋至文昌閣經文明橋折而西

抵階升橋

入泮池由池東出漱潤橋過雲津橋
西南注經通津橋出城南節流水門蜿蜒曲折

約長二里許

重濬事蹟

具載碑記

見藝文志

外城河

四週約長六里許廣十餘丈舊有堤埝
城北開源門外有袁公壩者今壩臺基

址尚存其袁公壩以上卽渠河故道也自朱家鋪朝霞寺至西鄆等莊抵弘福寺由平政橋接入城河計長四十里出節流門東南注經韓家橋至南鄆等莊由南石橋會入窩頭河

學宮

化民成俗建學爲先寶坻密邇

神京近

天子之光而佩聖人之教宜鼓舞於學宮者濟濟也按寶坻之學在縣治東北隅元至正間邑紳劉深朱斌普顏等改古權鹽院建之監邑事黑廝彥明重修有明自洪武弘治迄嘉靖以下增修

者代有其人不失舊制迄我

朝而彬彬大備焉顧百年以來葺理者亦屢矣非
大舉而更新之終懼其難爲繼也方將與紳士
協謀使泮壁生輝奚斯作頌豈不休哉今列其
制如左

大成殿五間中懸

御額

康熙三十年題萬世師表雍正四年題生民未有乾隆三年題與天地參殿之東啓

聖祠三間

雍正四年加封五代更名曰崇聖祠乾隆七年幾圯知縣洪肇楫捐俸修

聖殿前東西廡各五間戟門三間

康熙中邑紳士重修大學

士杜立德有記戟門之左爲名宦祠右爲鄉賢祠泮池

在其前又前曰櫺星門門外有大壁壁之左爲

忠義祠右爲節孝祠壁外有大池周垣數畝池

之南有雲津橋乾隆七年知縣洪肇憐因濬城河并濬泮池及修雲津橋橋

南曰雲津坊取晉張茂先龍躍雲津之意南一

百二十步有大坊曰雲路聖殿後明倫堂三間

明倫堂後成美堂三間東西側房各一明倫堂

左右爲進德修業二齋齋各三間今已廢宜重建兩齋

之南卽聖殿後壁也壁西盡處爲義路路西有

土地祠禮門對焉明倫堂所由出入也禮門直

南八十步許魁樓踞其上

雍正十年知縣伍澤榮重修

下卽

學宮之大門教諭宅在成美堂後明倫堂西偏

宅一所訓導居焉

土地祠已圯乾隆十年訓導賈念祖捐貲重建

露臺

在戟門內

尊經閣

在學宮西北

敬一亭

在明倫堂後

射圃

在學宮右俱廢

○按學基久混入民居今清丈

正中東長百五十一弓西長百四十六弓三尺

南寬五十五弓四尺北寬六十一弓三尺東北

隅長廿六弓寬廿五弓三尺照牆前長六十一

弓寬三十六弓三尺仁賢街北長六十弓寬廿

三弓雲路長百廿五弓寬四弓修學時宜釐正

附

社學

舊在縣治西久廢今移城內西街邑人趙士昌捐田一頃至本學學田數見賦役卷

縣治

臨民聽事之區觀瞻係焉居厥位考厥職入斯署也宜有凜然而動念者矣自金大定時設縣除令以主縣事丞簿佐之縣令王禔乃於大覺寺之西卜爲縣治東爲丞簿署縣北郭爲巡捕廳元季以兵燹廢明洪武元年遷縣治於城之西南隅合丞簿廳爲一所歷二百七十餘年廢興者數矣

國朝御治復仍前修葺之其官衙廳舍各如制以

後亦遞有損益云

舊制前爲大堂凡三間太堂之後爲二堂額曰
後樂蓋明萬歷時知縣袁黃所題取先憂後樂
意也二堂左右兩側房各三間東壁爲幕廳西
壁爲庫房堂前牌坊一座堂左右書吏房各七
間儀門三間大門如之獄在儀門右儀門東有
土地祠其東南爲寅賓館天啓時知縣周詩雅
題曰冰堂有冰堂記舊治之大凡如此後大堂
久漫漶僅存基址乃視事於後樂堂其堂左右

之側房與幕廳庫房皆撤餘如舊康熙五十四年
後樂堂就圯知縣黃志元葺之雍正八年堂
前牌坊剝落知縣伍澤榮修焉而自三堂之後
無復餘地退食視簿僅堪容膝乾隆七年知縣
洪肇楙乃詳 憲省節養廉銀營內署十餘楹
復建四堂三間額曰待軒有小跋公餘乃有憩所
非爲適已正以待後人也若縣衙在二堂後主
簿衙在縣衙西典史衙在縣衙東南各自增修
不悉載其縣丞衙以缺裁故廢

察院 府廳 陰陽學 醫學 接官亭

均在縣治

東

申明亭

在縣治西門外

僧會司

在廣濟寺

道會司

在城隍廟

演武場

初在縣西門外今移南門外

養濟院

在縣西北隅

附

常平倉

邑故有預備倉在縣治西南隅嘉靖三十三年知縣劉廓建倣古社倉於縣西

門內皆廢為民居至雍正十年知縣伍澤榮捐建社倉四間其明年又奉文建常平倉二十六間在縣署東南隅至常平倉現貯穀米數亦詳賦役卷

郵舖在縣治東其在縣西十里曰朱家莊舖在

縣西二十里曰崔家莊舖

論曰邑之規模視乎建置建置明而規模定矣

然始未嘗不整肅而後乃稍陵夷也詎不存乎
紹述之力哉夫入其境入其庭而政可知亦於
其規模卜之耳坐嘯城頭鳴琴清署彼有人焉
忍以爲傳舍也而忽諸余故舉自來所建置者
書地書時以無忘其始兼欲繼此者永永無斁
焉至如都邑旣建首重學宮而倉廩郵館皆縣
治中經畫所必及者亦得附書

建置卷之三終

祀典卷之四

國之大事惟祀爲先入學祭菜典禮不愆成民
致神奉醴告虔毋曰幽漠實式憑焉盼鑒網緼
對越於天志祀典

文廟

文廟卽在學宮中學宮已列建置卷復詳文廟
何哉宮則考其制廟則數其典也釋奠於

先師孔子煌煌儀注歷代遵焉可從畧歟

聖朝尊師重道封五代設太牢增樂舞又有超軼前

代者畧而不書其何以觀禮詳考冠諸卷首爲
祀典光猗歟盛矣

大成殿

至聖位居中復聖述聖在左宗聖亞聖在右當祭則
配殿左右爲十二哲從祀其東西兩廡祀七十
二賢及歷代諸儒之有功聖學者各分獻

崇聖祠在殿之東祀

先聖五代

雍正四年追封崇以王爵曰
裕聖王 詒聖王 昌聖王 肇聖王
啓聖王

以四配之考配之從祀者爲周程張朱蔡五先